

# Ahmady, Christina Olahragawan dan Olahragawati UMS 2017/2018

UB 9.5.2018 A10

Oleh VITALIS G BINGKASAN

**KOTAKINABALU:** Atlet taekwondo Ahmady Radi dan 'wanita besi' Christina Edris dinobatkan sebagai pemenang Anugerah Olahragawan dan Olahragawati Universiti Malaysia Sabah (UMS) 2017/2018.

Anugerah itu disampaikan pada Majlis Penghargaan Hal Ehwal Pelajar Dan Alumni UMS (MAHEPA) Ke-20 di Hotel Klagan 1 Borneo pada Isnin.

Majlis itu disempurnakan Mayor Dewan Bandaraya Kota Kinabalu (DBKK), Datuk Yeo Boon Hai.

Ahmady, pelajar tahun dua Fakulti Kemanusiaan, Seni Dan Warisan menang anugerah itu atas pencapaian memenangi pingat emas acara poomsae campuran Sukan Institusi Pengajian Tinggi (SUKIPT)

Kebangsaan 2018, pingat perak poomsae individu SUKIPT Kebangsaan 2018 dan pingat gangsa poomsae individu Kejohanan Taekwondo Dunia Terbuka Malaysia 2018.

Christina yang dikenali sebagai 'wanita besi' UMS kerana kemampuannya mewakili banyak acara sukan pula terpilih atas pencapaiannya dalam beberapa jenis sukan.

Antara pencapaian utama yang menjulang pelajar tahun tiga Falkulti Perniagaan, Ekonomi Dan Perakaunan itu adalah menjadi anggota skuad ragbi kebangsaan yang menang pingat gangsa Sukan SEA Kuala Lumpur 2017, menang pingat emas acara kumite karate pingat perak silat SUKIPT Kebangsaan 2018.

Ahmady dan Christina masing-masing menerima wang tunai RM1,000, piala dan sijil.

Atlet olahraga Tonga Jody

Edmund dan atlet taekwondo Nur Ifa Husna Saiful pula dinobatkan sebagai penerima Anugerah Olahragawan Harapan dan Olahragawati Harapan.

Tonga, pelajar tahun satu Fakulti Psikologi Dan Pendidikan adalah pemenang pingat emas acara 200m dan pingat perak 100m Kejohanan Olahraga Majlis Sukan Universiti Malaysia (MASUM) 2018.

Nur Ifa yang juga pelajar tahun satu Fakulti Psikologi Dan Pendidikan pula adalah pemenang pingat gangsa poomsae berpasukan Kejohanan Taekwondo Dunia Terbuka Malaysia 2018, pingat emas poomsae campuran dan pingat perak poomsae berpasukan SUKIPT Kebangsaan 2018.

Sukan taekwondo terus mendominasi apabila pasukan poomsae lelaki dan wanitanya juga dinobatkan sebagai penerima Anugerah Pasukan Terbaik.



**AHMADY** (kanan) dan Christina Olahragawan dan Olahragawati UMS merakamkan gambar bersama hadiah yang dimenangi.